

KESIMPULAN

Sistem politik di dalam sesebuah negara memang berkaitan rapat dengan penglibatan atau keperihatinan rakyat terhadap urusan pentadbiran negara. Pemerintahan demokrasi lebih menjamin kebebasan bersuara dan mengajukan tuntutan dan kehendak rakyat. Dalam pada itu kerajaan juga harus sensitif terhadap kemahuan mereka. Sistem ini juga membuka ruang kepada penyertaan rakyat untuk mengambil bahagian atau mempengaruhi pihak berkuasa di peringkat tempatan atau nasional dalam membuat keputusan.

Begitu juga dengan keadaan masyarakat Islam di Narathiwat. Tindakan mereka banyak di pengaruhi oleh corak pemerintahan kerajaan Thailand di Bangkok. Sebelum tahun 1973 kegiatan mereka di setiap bidang amat terhad. Mereka harus berhati-hati dalam mengeluarkan pandangan khususnya yang berkaitan dengan tindakan kerajaan. Pihak berkuasa tempatan sentiasa mencurigai para pemimpin masyarakat yang lantang menyuarakan keresahan penduduk setempat. Mereka dikhawatir menjadi jurucakap atau sekurang-kurangnya bersimpati dengan perjuangan pembebasan wilayah Pattani.

Dengan peningkatan kegiatan kekerasan yang dijalankan oleh gerakan pemisahan yang menjadikan orang bukan Islam sebagai sasaran utama dalam tindakan mereka dalam rangka membebaskan Pattani dari kekuasaan kerajaan Bangkok telah meruncingkan lagi keadaan di Narathiwat. Pihak berkuasa membuat tekanan dan mencabuli hak asasi manusia. Walaupun diadakan pilihanraya pada tahun 1969 tetapi dua tahun kemudian

dibubarkan parlimen serta diharamkan segala kegiatan poltik. Wakil rakyat yang ada ketika ini, seorang beragama Islam dan seorang lagi beragama Buddha tidak banyak memainkan peranan membela nasib rakyat yang tertindas di wilayah yang diwakili oleh mereka berdua. Setelah pemerintahan tentera kembali berkuasa, seluruh masyarakat Islam mendiamkan diri atau menjauhkan diri daripada mengkritik atau membabitkan diri dalam kegiatan yang dirasakan berunsur politik. Di masa itu bukan sahaja kegiatan yang berunsur politik malah perkataan politik “Kan Muang” dalam bahasa Thai itu sendiri dikhuatiri berbahaya jika disebut di hadapan khalayak.

Masyarakat Islam mula cergas kembali selepas penggulingan rejim tentera pada tahun 1973. Kebebasan bergerak dan bersuara lebih terjamin dalam era demokrasi. Masyarakat Islam di desa dan di kota mulai mengenal demokrasi dalam erti kata sebenar. Keluhan keresahan dan kebajikan masyarakat Islam. Walaupun pada peringkat awal, kumpulan Islam tidak mendapat kejayaan sepenuhnya tetapi ia adalah asas yang kukuh bagi orang Islam yang menyusuli mereka untuk menguasai tampuk kekuasaan tempatan.

Suasana demokrasi mendorong orang Islam tampil menuntut hak-hak asasi mereka dengan lebih berkesan dan matang. Namun mereka masih dihantui rasa resah jika ianya menyentuh kepentingan pihak berkuasa tempatan yang mana pengaruhnya masih menebal dan menghalangi kuasa politik Bangkok dalam menangani dan menyahut tuntutan masyarakat Islam di Narathiwat khasnya dan masyarakat Islam di selatan pada amnya. Kuasa politik Bangkok akan condong kepada tekanan pihak berkuasa tempatan jika

masalah yang berbangkit dilihat daripada perspektif keselamatan negara. Faktor inilah yang menghambat masyarakat Islam di Narathiwat dalam proses penyertaan dalam politik secara keseluruhannya.

Penggulingan kerajaan demokrasi oleh tentera pada bulan Oktober 1976 telah memadamkan wadah perjuangan orang Islam dalam politik negara Thailand. Masyarakat Islam membisu dan mengarah pandangan mereka kepada pergerakan pemisahan yang semakin mengganas. Masyarakat Islam kembali bergerak dalam politik apabila pilihanraya umum pada tahun 1980 diadakan.

Boleh dikatakan bahawa pada tahun 1970-an di Narathiwat menampakkan satu tempoh masa yang penuh kesedaran di kalangan masyarakat Islam untuk turut serta dalam politik di negara Thailand amnya. Pada satu tahap, masyarakat Islam mula meyakini sistem politik negara dan cuba mempengaruhi parti-parti politik dan kerajaan dalam rangka memenuhi tuntutan masyarakat Islam di selatan termasuk Narathiwat. Tempoh era demokrasi juga adalah titik peralihan perjuangan umat Islam dari perjuangan bersenjata yang banyak mengorbankan jiwa dan harta benda kepada perjuangan menuntut hak keadilan secara terbuka. Kepedihan yang dilakukan oleh pihak berkuasa setempat khususnya Polis diluahkan secara terbuka walaupun masih dibayangi oleh perasaan takut dan cemas. Pihak berkuasa Polis mula merasakan dicabar kerana mereka dahulu bebas melabelkan orang Islam sebagai pemberontak atau pemisah wilayah, kini persatuan yang mewakili orang Islam dapat mendampingi pemimpin tertinggi negara dan memberi

gambaran sebenar apa yang berlaku di wilayah Narathiwat. Keadaan ini membuatkan sesetengah pegawai polis memprotes terhadap dasar kerajaan terhadap orang Islam.

Satu perkembangan baru di era ini ialah lahirnya elit Islam yang berpendidikan akademik yang menceburkan diri dalam arena politik. Perkara ini tidak pernah berlaku sebelum ini kerana selalunya politik pilihanraya dimonopoli oleh pemimpin tradisional atau mereka yang tidak berkelulusan universiti. Penglibatan golongan elit baru dalam masyarakat Islam di Narathiwat ini adalah hasil pertama (first badge) dari dasar galakan pelajar Islam memasuki pusat pengajian tinggi di zaman Thanom. Boleh dikatakan generasi inilah yang mengorak langkah dalam penglibatan politik secara terbuka dan sah mengikut undang-undang. Sebelum ini graduan universiti terutama dari timur tengah lebih cenderung kepada politik pergerakan pemisahan yang bergerak secara sulit dan tidak menampakkan ikecergasan dan kecekapan mereka di arena politik pilihanraya di peringkat tempatan ataupun nasional. Golongan elit berpendidikan agama ini selalu dicirigai oleh pihak pemerintah apatah lagi mereka bergerak di bidang pendidikan dan tertumpu di pondok-pondok atau sekolah agama rakyat sahaja. Pada pandangan pemerintahan di ketika itu, pondok adalah pusat penyebaran dakyah pihak gerakan pemisahan.

Namun begitu, terdapat beberapa orang yang berkelulusan dari universiti Timur Tengah yang cuba mendampingi masyarakat tempatan dengan mencebur dalam persatuan Islam tempatan. Kegiatan mereka selain daripada memimpin persatuan juga turut menyebar fahaman Kaum Muda atau ajaran Islam yang berlandaskan al-Quran dan As-Sunnah. Tetapi oleh kerana tebalnya fahaman tradisional yang menguasai beberapa

institusi rasmi tempatan maka sambutan di kalangan rakyat kurang menggalakkan, malahan pelopor fahaman kaum muda sendiri mencebur dalam bidang kehakiman yang terikat dengan fahaman Islam tradisional.

Perkembangan politik tempatan tidak kurang juga penglibatan orang Islam di Narathiwat. Dalam pilihanraya Majlis Perbandaran, orang Islam buat kali pertama mengorak langkah bersatu menubuhkan satu kumpulan calon yang ditampilkan untuk berkhidmat kepada masyarakat setempat. Fenomena ini adalah salah satu reaksi orang Islam terhadap penguasa majlis tempatan di wilayah selatan yang rata-rata hanya dikuasai oleh orang Buddha. Walaupun mereka gagal tetapi prinsip perjuangan tetap diteruskan hanya strategi yang berubah mengikut keadaan.